


mainatges d'òc **PLUMALHON**



Gandhi

**Descobris lo ganhant de
nòstre jòc-concors !!!**



Energia : lo vent



**Lo pescaire
d'anguilas**





Los pescaires d'anguilas

Peirac de Mar, sus la còsta mediterranea. Son 5 oras del matin e veni d'embarcar amb Estève qu'es pescaire professional e especialista del pescar d'anguilas. D'aquesta ora, es nuèch encara, mas Estève coneis plan l'estanh de Bajas.



Per començar, Estève pausa un fialat long d'un vintenat de mètres, fixat al bòrd e puèi tendut en direccion de la mar. Al cap del fialat penjan tres nassas. Las broas de l'estanh son envasidas d'algas ont vivon un fum de micro-organismes, de crancs, de cambaròts e d'autres bestiòtas. La nuèch, las anguilas i venon per s'avidar.

Lo matin, quand tornan partir al larg, las anguilas van lo long del fialat e se fan emprisonar. Un còp pausat lo fialat, tornam levar los qu'aviam installat la velha. I a plan anguilas dins la primièra nassa levada : sufis de dubrir lo fons per las aver. Estève torna tendre la nassa al fons de l'aiga per la nuèch que ven e part ne levar d'autres.



Enfin, lo jorn se lèva. Abans de tornar al pòrt levam un fialat amb sas nassas que son dins l'aiga dempuèi quatre jorns : an plan besonh de netejar.



Estève desvista un trauc dins una nassa, lo cal petaçar còp sec. O fa amb una agulha especiala e de fial de nilon. Barra menimosament los traucs.





U èch oras e mièja, sèm tornats al pòrt. Avèm facha bona pesca. Ara, nos cal esperar qu'arribe lo camion del peissonièr.

Estève pesa amb la peissonièra. Uèi a pescat 61 kg d'anguilas.

Tanlèu pesadas, las anguilas son mesas dins de cups emplots d'aiga e oxigenats, dins lo fons del camion.



La sason de pesca de l'anguila va de març a decembre. Fa 15 ans que pesca Estève. Pren entre 2 e 3 tonas d'anguilas cada an. Quinze ans a, ne pescava de 9 a 10 tonas. Mas èra abans la pollucion de l'estanh amb los pesticides e los engrais agricòlas. Abans lo braconatge de la civèla, lo pichòt de l'anguila.



10 h 00, la matinada de trabalh es acabada. Estève neteja al raj d'aiga lo fialat qu'avèm tornat.